

Existencia di Gobierno ta depende di ultimatum cu ta vence awe mainta 10'or y 30 dia



ORANJESTAD (AAN) Manera cu DIARIO a publica ayera, atrobe tin tension den e coalicion AVP / OLA y tambe cu e asunto di comisariado lo bay forma un problema pa e gobierno nobo, ni 10 ora despues cu e edicion di DIARIO a sali riba mercado, ya caba prome ministro señor Henny Eman ta laga

pueblo sa ayera atardi cu gobierno ta den basha abao pa motibo di comisariado.

Partido AVP no por a guli e pildora cu OLA a pone pa nan door di kita comisario di AVP den proyecto di Aeropuerto y ayera Henny Eman a laga sa cu dje forma ey AVP no por sigui goberna cu OLA y cu pa awe mainta 10'or si OLA no

hala atras su decision anto no lo bay tin gobierno mas.

Partido OLA a kita un comisario di Aeropuerto señor Maduro y a reemplaza esaki pa un otro comisario y aki ta caminda cu e sapato a primi demasiado duro pa AVP pasobra segun AVP nan ta e partido cu mas asiento y OLA no por kita nan comis-

arionan den aeropuerto.

Di OLA su banda nan tabata haya cu palabracionnan haci cu AVP a duna nan tur caminda pa cana pa asina pone nan mesun hendenan den comisariadonan cu ta cay bao di carteranan di ministro nan di OLA.

Lider di OLA a declara ayera cu si AVP kier laga gobierno cay pa un comisariado anto nan mester bisa pueblo esaki den palabranan cla y raspa y laga pueblo huzga AVP pa esaki pasobra OLA no ta haya cu gobierno di Aruba mester cay pa un comisariado.

Ayera tambe tanto di parti di AVP como di OLA tabata ser papia di un periodo di 30 dia pa sinta discuti e problema cu a surgi pa asina yega na un conclusion final si AVP y OLA ta bay sigui goberna cu otro si o no.

Prome Ministro Henny Eman ta papia di ultimatum pa awe mainta 10'or y di otro banda OLA mes ta papia di un periodo di 30 dia pa sinta papia y regla cuenta; awor ta kico pueblo mester kere y tras di ken pueblo mester bay?

Ta tras di e ultimatum di awe mainta 10'or o tras di otro periodo di incertidumbre di 30 dia pueblo mester bay?

For di fuentenan den OLA, DIARIO a haya reaccion riba e asunto di comisariado cu

segun OLA no por forma un motibo di peso pa benta gobierno abao pasobra tin departamentonan

y proyectonan cu ta cay bao di ministerionan di AVP caminda OLA tampoco tin comisario y OLA no a haci esakinan bira un problema y awor ta dicon AVP si kier laga comisariado di aeropuerto bira un problema pa benta gobierno abao?

Como ehempel nan a mencioná FCCA, proyecto di Radisson y Hyatt caminda partido OLA no ta representa pa ningun comisario.

Palancanan di OLA ta haya cu si ministro Tico Croes ta declara publicamente cu mester baha gasto anto ta kico tin contra pa kita un comisario di proyecto di aeropuerto cu ta costa pueblo 1.6 milyon florin na pago pa aña?

E comisario nobo cu OLA a pone no ta bay costa pueblo 1.6 milyon florin pa aña y OLA no ta compronde dicon AVP kier bringa cueste loke cueste pa defende un solo comisario; ta kico AVP ta defende, entrada di un comisario o bahamento di gastonan?

OLA a laga sa cu si AVP kier baha gobierno pa un comisario anto pueblo por conta cu tras di e argumentonan fofo di AVP mester tin algo cu no ta hole bon.

Ministro Beke a orienta su mes bishitando e departamentonan



ORANJESTAD [AAN] Dr. Humphrey van Trikt, director di Departamento di Asunto Economico, a ricibi Ministro dr. Lili Beke-Martinez y su comitiva na su despacho na ocasion di e bishita di orientacion. Durante e bishita e Ministro a

haya un recorrido na diferente di e departamentonan na unda a haya un splicacion con henter e departamento aki ta hinca den otro. Drs. H. Van Trikt a reuni cu Ministro Beke y inform'e e cuestionnan con henter e departamen-

tonan ta andando y na mes momento informa tocante e proyectonan cu tin pendiente.

Tambe Drs. Van Trikt a trece adilanti cu tin proyectonan pendiente cu ta di vital importancia pa ser continua y checuta.

BRAZIL Y HULANDA A KEDA COMO FAVORITO

ORANJESTAD (AAN): Di yamadananan ricibi na DIARIO y puntra encuanto nan favoritismo di mundial, a cera ayera tardi 100 opinion di lectoran.

Di esakinan, Brasil ta ocupa prome lugar cu 31 persona indicando cu Brasil ta bira campeon atrobe.

Hulanda tabata tin 24 voto, y a wordo sigui sorpresivamente pa paisnan latino, Argentina cu 19, Paraguay cu 14, Chile cu 11 y Alemania cu 1.

Pero despues di ayera tardi, ora cu a yega e 100 opinionnan, puntrando mas hende durante anochi, a resulta cu Alemania a haya 7 voto mas Hulanda 6, Brasil 3, y Colombia a bin haya su prome 4 votonan.

Sigur ta cu despues di e weganan di awe e opinionnan lo cambia pa e siman venidero pasobra Argentina, Colombia, Mexico y Francia lo bin bay probablemente den e preferencianan dependiendo di e weganan di fin di siman tambe y comienzo di siman te cu diaranzon cu ta dia liber.

TELEFONNAN DI DIARIO
826747 - FAX 828551